



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

[Claudio Lalano Sodali Svo I. B. Santolius V.]

Santeul, Jean de

[S.l.], 1670

Pro Sancto Victore Martyre. Hymnus.

**urn:nbn:de:hbz:466:1-13421**



P R O  
 S A N C T O V I C T O R E  
 M A R T Y R E .

*Hymnus.*

**V** O s ô Christiadum fortia pectora,  
 Clarum Massiliæ dicite Militem:  
 Tinxit qui proprio sanguine, quam sacro  
 Gestat vertice lauream.

V I C T O R militiæ præmia respuens  
 Christi castra ducis nudus amat sequi;  
 Ritus sacrilegos, signaque Cæsaris  
 Felix transfuga deserit.

Vinctum compedibus turba satellitum  
 Nequicquam rigido carcere detinet:  
 Carcer perpetuis noctibus obsitus  
 Tanto lucet ab hospite.

Miles Pontificis munere fungitur,  
 Custodes pavidos crimina dedocet,  
 Sacris lustrat aquis, & nova pectora  
 Vero numine roborat.



Sit laus summa Patri, summaque Filio,  
 Sit par sancte tibi gloria Spiritus:  
 Tali praesidio praemia sustinent  
 Fuso sanguine Martyres.



**I** Nunc sancte Pugil, quo pia praemia,  
 Quo te magna vocant praemia Militem:  
 Praesens Christus adest; hoc duce ferreas  
 Vinces carnificum manus.

Urbem per mediam victima nobilis  
 Raptaris, lacero corpore pulchrior:  
 Dum discerpta trahit membra ferox equus,  
 Coelum mente praecipuas.

Quo te cumque furor barbarus abripit,  
 Fusus vulneribus signat iter cruor,  
 Sparso quo veluti semine, laetior  
 Surgit Christiadum seges.


Hic dum verberibus plectitur asperis,  
 Longa perfruitur supplicii mora:  
 Affixumque cruci nobilis Aemulus  
 Christum, qua licet, exprimit.



Aras ante Jovis non timidus mori  
 VICTOR thura negat : sacrilegam pede  
 Deturbat statuam , nec metuit gravem  
 Vano fulmine dexteram.

Plebs irata pedem Militis amputat ;  
 Sed non ille gravi vulnere tardior  
 Ad mortem properat , certa que præmia ;  
 Vitam fundere prodigus.

Sit laus summa , &c.



**T**empla solemnem resonent triumphum :  
 Hæc dies , longi pretium laboris ,  
 Strenuum Christi Pugilem supremas  
 Vexit ad Arces.

Dum terit sacros mola grandis artus ,  
 Rumpitur venis cruor è profundis :  
 Tum cruentatæ caput immolandum  
 Devovet aræ.

Vindices Æther jaculatus ignes  
 Machinam solvit , tremuere turbæ ,  
 Nil tremens unus pia colla VICTOR  
 Subjicit ensi.



Mox triumphali petit astra curru,  
 Splendido frontem redimitus auro:  
 Compedes, Virgæ, Mola, Crux, Securis,  
 Pompa triumphi.

VICTOR, exemplis animosiores,  
 Fac tuis nostras sociare palmas,  
 Et quibus Christi superemus hostes,  
 Arma ministra.

Ille, quo sternis simulacra divum,  
 Ille pes nostris venerandus aris  
 Ire calcatum monet execrandæ  
 Fercula pompæ.

Laus tibi, summi moderator orbis,  
 Præmiis duros recreans labores,  
 Quem Fides veri studiosa, Trinum  
 Credit & Unum.

